



Tarcisi Cadruvi ed Yvonne Margreth han plascher ch'els han astgau separicipar al campinadi svizzer.



Era Annina Tomaschett da Trun ha astgau prender part dil campinadi svizzer.

FOTOS L. CADRUVI/MAD

Quater medaglias pil Grischun

Dils 3 entochen ils 10 da settember ha il Campinadi svizzer da tir giu liug a Thun

DA LEILA CADRUVI / ANR

■ **Al Campinadi svizzer da tir 2017 han ils tiradurs grischuns priu quater medaglias a casa. Fallet, Flütsch, Hartmann e Caluori senumnan ils victurs.** Culla pistola gudogna *Elmar Fallet* cun 574 puncts la medaglia d'aur. Era il giuven tiradur da pistola *Nando Flütsch* ei sil podest a Thun, el ei vegnius tierz. Silla distanza da 300 meters gudogna la tiradura *Mirjam Hartmann* la medaglia da bronz en duas posiziuns. La davosa medaglia pil Grischun sieta la giuvna *Valentina Caluori* cul caliber pign. Era tshels tiradurs grischuns ch'ei sequalificai pil campinadi svizzer han perschuadiu.

Fallet e Flütsch culla pistola

Il campin svizzer 2017 ella categoria pistola da sport B silla distanza da 50 meters senumna *Elmar Fallet* da Müstair. Fallet gudogna cun 574 puncts, pia treis puncts dapli ch'il secund *Dieter Grosse*. Gia igl onn vargau ei Fallet staus campin svizzer ella categoria pistola da sport silla distanza da 25 meters. Ina secunda medaglia pil Grischun sieta il tiradur da pistola *Nando Flütsch*. Il giuven da St. Antönien gudogna bronz ella categoria dils juniors silla distanza da 50 meters. Dasperas daventa Flütsch otgavel cun 549 puncts ella categoria dils juniors silla distanza da 25 meters. Tier las dunnas vegn *Sofie Lehmann* ella categoria da pistola da sport silla distanza da 25 meters siatavla cun 564 puncts. La victura da quella concorrenza senumna era uonn *Heidi Diethelm Gerber* che ha gudignau l'emprema medaglia per la Svizra all'olimpiada a Rio. Plinavon sieta *Stephan Lehmann* da Cuera 531 puncts ella categoria pistola da fiug rapid silla distanza da 25 meters, el vegn aschia dieschavel.

Hartmann gudogna bronz

Silla distanza da 300 meters gudogna la tiradura *Mirjam Hartmann* la medaglia da bronz culla buis d'assagl 90 en duas posiziuns. Cun 96, 93 e 92 en venter ed 89, 83 ed 89 en schanuglias sieta la tiradura da Seewis-Schmiten in total da 542 puncts. Era dalla partida en quella concorrenza ein il vicecampin grischun 2017 *Otto Morell* da Samedan, ed era *Hermann Jemmi* da Castrisch che ha gudignau igl onn vargau la medaglia da bronz al campinadi svizzer. En venter culla buis d'assagl 90 sieta *Ueli Conrad* da Tavau 96, 95, 91, 94, 94 e la davosa passa 91 puncts e daventa aschia siatavel. Quei dat in total da 561 puncts, pil podest havess ei duvrau 566 puncts. Era sequalificaus pil campinadi svizzer en quella categoria ei *Christian Studer* da Castrisch. El sieta 540 puncts ed ha aschia giu paucas schanzas per ina medaglia. Culla buis d'assagl 57 en venter ein ils treis tiradurs da Tumeigl, *Hermann Sgier*, *Dirk Frischknecht* e *Mauro Ardüser*, ed il campin grischun 2017 *Tarcisi Cadruvi* da Ruschein dalla partida. Sgier e Frischknecht, il campin grischun en duas posiziuns, sietan omisus 567 puncts. Els munchentan mo per sis puncts il podest. Frischknecht havess giu grondas schanzas da gudignar ina medaglia, el sieta denton las duas davosas passas mo 91 puncts.

Caluori argien – Klucker in diplom

Silla distanza da 50 meters cul caliber pign demuossa *Valentina Caluori* puspei inaga siu talent. Cun 616,7 puncts daventa ella secunda ella categoria dallas junioras. Mo cun 0,2 puncts dapli defenda *Olivia Haggmann* dil cantun Sogn Gagl il tetel sco campinessa svizra. El matsch da treis posiziuns ha Caluori fatg in sbagl en venter ed aschia piars quater puncts impurtonts per contonscher il final. Quelluisa ha la giuvna da Razén contonschiu il dieschavel

plaz. Era la Romontscha *Annina Tomaschett* da Trun ei sequalificada pil campinadi svizzer. Ella sieta 603,0 puncts en venter e 549 puncts en treis posiziuns. Ella categoria juniors sut 17 onns ei *Simon Klucker* per l'emprema ga dalla partida al campinadi svizzer. Il giuvenil da Tumein sieta fetg buns 607,6 puncts. Cun quei resultat vegn el sisavel e gudogna in diplom. Remarcabel eis ei ch'igl ei igl emprem onn ch'il giuvenil dall'annada 2003 separicipescha a cumbats. Gia al campinadi grischun d'uonn eis el daventaus vicecampin grischun en venter.

Sia sora pli veglia *Anna Laura Klucker* ch'ei pli enconuschenta ella scena da tir ei sequalificada pil campinadi svizzer en treis posiziuns tier las dunnas. Cun duas ga 95 en schanuglias, duas ga 99 en venter e 91 e 90 sin peis sieta ella in total da 569 e contonscha il bien 13avel rang. Pil final havess ei duvrau otg puncts dapli. Medemamein sieta *Carina Caluori*, la sora da Valentina, 569 puncts cun otg muschas pli pauc che Klucker. Ella categoria en venter tier las dunnas ei *Yvonne Margreth* la megliera tiradura grischuna. Margreth sieta buns 614,0 puncts, e daventa 17avla, suandada d'*Elena Tomaschett* da Rabius cun 613,8 puncts. «Jeu sun fetg cuntenza. Tgei dat ei pli bi che saver sitar in niev record personal al campinadi svizzer?», tarlischa Margreth da Castrisch. Al campinadi grischun haveva *Yvonne Margreth* fatg in total da 610,5 puncts, pia 3,5 puncts pli pauc. Cun quei resultat da 614,0 fuss ella stada l'emprema dunna ella prerunda al campinadi grischun. E lu aunc *Lars Färber*: il campin grischun 2017 en venter ei era separicipaus al campinadi svizzer. Il tiradur da Favugn sieta 615,1 puncts ell'eliminaziun. Silsuenter suonda la qualificaziun e leu sieta el fermes 618,1 puncts. Quei dat il 13avel plaz. Mo per 2,3 puncts tonscha ei buca pil final.



Valentina Caluori gudogna argien cul caliber pign tiellas junioras en venter.



Anna Laura Klucker sieta fermes 569 puncts en treis posiziuns.



Elena Tomaschett sieta 613,8 puncts en venter cul caliber pign.



Il campin grischun Tarcisi Cadruvi sieta il matsch da 60 siets en venter culla buis d'assagl 57.